

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- 1 प्रधानमंत्री नरेन्द्र मोदी होर सोनामर्ग सुरंग दा अज्ज उद्घाटन करगन। एह्दे कन्नै जम्मू कश्मीर च राबता बेहतर होग ते सैलसफा गी बढ़ावा थहोग।
- 2 मुख्यमंत्री उमर अब्दुल्ला होरें आखेआ ऐ जे सोनामर्ग सुरंग दे उद्घाटन कन्नै सोनामर्ग गी सयालू खेड्डें दी इक थाहर दे तौर पर विकसित करने दी बत्त पदरी होग।
- 3 उपमुख्यमंत्री होरें आखेआ ऐ जे प्रदेश दा सामा ते पूरा पराता विकास करना सरकार दी तरजीह ऐ।
- 4 खेड्ड मंत्री सतीश शर्मा होरें केन्द्रीय मंत्री डॉ. मनसुख मांडविया हुंदे कन्नै मलाटी कीती ते जम्मू कश्मीर गी खेड्डें सरबन्धी केन्द्र बनाने आले जतनें पर चर्चा कीती।
- 5 उत्तर भारत च अज्ज लोहड़ी दा ध्यार मनाया जा'रदा ऐ। राष्ट्रपति, उपराष्ट्रपति, उपराज्यपाल ते मुख्यमंत्री होरें लोकें गी इस मौके पर शुभकामनां दित्तियां।

<><><><><><>

PM Tunnel

प्रधानमंत्री नरेन्द्र मोदी होर अज्ज रणनीतिक स्थाबै बड़ी मती महत्वपूर्ण सोनामर्ग सुरंग दा उद्घाटनकरगन। एह्दे कन्नै श्रीनगर ते सोनामर्ग बश्कार हर मौसम च राबता उपलब्ध होग। अपने दौरे दरान प्रधानमंत्री होर उत्थें लग्गे दे कम्मगारें कन्नै मलाटी करगन ते कम्में दा जस उनेंगी दिंदे होई उंदे प्रति सम्मान प्रगट करगन। एह्दे निर्माण पर 2 जहार 7 करोड़ रपे दी लागत आई ऐ। 12 किलोमीटर लम्मी एह सुरंग लद्दाख तगर पुज्ज गी बधाग ते इस सुरंग कन्नै लास पस्सियां पौने आले इलाकें थमां बी लंघना नेई पौग। सुरंग करी गगनगीर ते सोनामर्ग बश्कार यात्रा दा समां घट्ट होई जाग। इस परियोजना कन्नै मेद ऐ जे सैलसफा गी बढ़ावा थहोग, आर्थिक बाद्धा विकास होग। रणनीतिक स्थाबै लाह होग ते जम्मू ते कश्मीर ते लद्दाख दी समाजी ते सांस्कृतिक इकजुटता गी बढ़ावा थहोग। सोनामर्ग च होने आले उद्घाटन समारोह दरान केन्द्रीय मंत्री नितिन गडकरी, डॉ. जितेन्द्र सिंह, उपराज्यपाल मनोज सिन्हा, मुख्यमंत्री उमर अब्दुल्ला ते होर दुए मन्ने परमन्ने दे लोक मजूद रौहगन। प्रधानमंत्री मोदी हुंदे दौरे दे गी दिक्खदे होई सुरक्षा दे पुख्ता बंदोबस्त कीते गेदे न।

<><><><><><>

CM Sonamarg Winter Dest

मुख्यमंत्री उमर अब्दुल्ला होरें गुलमर्ग दे अपने दौरे दरान उत्थें स्यालु सैलसफा गी बढ़ावा देने लेई सोनामर्ग गी स्यालू खेड्डें दे प्रमुख केन्द्र दे तौर पर विकसित करने लेई जोर पाया। उनें आखेआ जे सोनामर्ग सुरंग दे उद्घाटन कन्नै हर मौसम च राबता उपलब्ध होग ते सोनामर्ग गी गुलमर्ग आला लेखा स्यालू खेड्डें लेई इक केन्द्र दे तौर पर विकसित कीता जाई सकदा ऐ ते एहदे आस्तै हर संभव जतन कीते जांगन। इस सुरंग दा उद्घाटन प्रधानमंत्री नरेन्द्र मोदी हुंदे आस्सेआ अज्ज कीता जाग। मेद कीती जा'रदी ऐ, एहदे कन्नै पूरे ब'रे लेई सोनामर्ग गी सैलानी केन्द्र बनाने च मदद थहोग।

<><><><><><>

MoS Viksit Bharat

केन्द्री मंत्री डॉ. जितेन्द्र सिंह होरें आखेआ ऐ जे विकसित भारत दे निर्माण लेई नोजवानें गी अपने बचारें गी हकीकत च बदलना होग ते अपनी रचनात्मकता आसें तांगें ते ऊर्जा गी सेई दिशा देइयै एहदे लेई योगदान देना होग। मंत्री होरें युवा सेवाएं ते खेड्डें सरबन्धी मंत्रालय आस्सेआ आयोजित राष्ट्री युवा उत्सव 2025 थमां बक्ख बाहरें जम्मू कश्मीर ते लद्दाख थमां तकरीबन 100 विद्यार्थिएं दे समूह लेई आयोजित रातीं दी रूट्टी आले इक कार्यक्रम दरान बोला करदे हे। इनें नोजवानें गी संबोधत करदे होई मंत्री होरें राष्ट्र दे भविक्ख गी आकार देने च नोजवानें आस्सेआ संचालित पैह्लकदमिएं दे महत्वै पर लोह पाई ते इलाकाई संसाधनें ते स्टार्टअप्स सनें बायो टैक्नालोजी, एग्री-टैक ते अक्षय ऊर्जा जनेह खेत्तरें च मजूद मौकें बारे बी बचार सांझे कीते। डॉ. सिंह होरें एरोमा मिशन दे तैहत लवेंडर दी खेती जनेह प्रोजेक्टें च युवाएं दी शमूलियत दी सराहना कीती ते एहदे च उंदे मंत्रालय दी तरफा पूरे सैहयोग दा भरोसा बी दोआया।

<><><><><><>

Depty CM Development

उपमुख्यमंत्री सुरिन्दर चौधरी होरें दोहराया जे समाजिक ते आर्थिक तौर पर सशक्तिकरण ते सब्बने दा पूरा पराता विकास मजूदा प्रदेश सरकार दी पैहली तरजीह ऐ। एह गल्ल उनें आर.एस.पुरा च आयोजित इक कार्यक्रम गी संबोधत करदे होई आक्खी। उनें भरोसा दोआया जे जम्मू कश्मीर दे हर क्षेत्र च विकास कम्म बरोबर

<><><><><><>

Lohri Greetings

फसलें सरबंधी ध्यार लोहड़ी अज्ज पूरे उत्तर भारत च मनाई जा'रदी ऐ। एह ध्यार खास तौर पर पंजाब, हरियाणा, हिमाचल प्रदेश, दिल्ली, जम्मू कश्मीर ते चंणीगढ़ च मनाया जंदा ऐ। इआं मन्नेआ जंदा ऐ जे लोहड़ी दे ध्यार मगरा स्यालै दरान होने आलियां लम्भियां रातां घटना शुरू होई जंदियां न, दिन लम्मे होने शुरू होई जंदे न। लोक लोहड़ी आले दिन संजा लै अगग बालदे न, ओहदी प्रक्रिया करदे न ते मूंगफली, रेओड़ियां ते गजकें दा अर्ग दिंदे न ते फही इनें चीजें गी अपने दोसते, गौआढ़िएं ते रिश्तेदारें गी बंडदे न। राश्ट्रपति द्रौपदी मुर्मू, उपराश्ट्रपति जगदीप धनखड़ होरें लोकें गी लोहड़ी दियां शुभकामनां दित्तियां न। उपराज्यपाल मनोज सिन्हा ते मुख्यमंत्री उमर अब्दुल्ला होरें बी जम्मू कश्मीर दे लोकें गी लोहड़ी ते मक्कर संक्राति दियां शुभकामनां दित्तियां न।

<><><><><><>

LG NCB Conference

केन्द्री गृह ते सहकारिता मंत्री अमित शाह होरें नारकोटिक्स कन्ट्रोल ब्यूरो – एनसीबी आसेआ नमीं दिल्ली च आयोजित इक इलाकाई सम्मेलन दी कल प्रधानता कीती। इस सम्मेलन दा विशे—सार हा 'नशे पदार्थें दी तस्करी ते राश्ट्री सुरक्षा'। लेफ्टिनेंट गवर्नर मनोज सिन्हा होरें जम्मू थमां वर्चुअल ढंग्गै कन्नै इस सम्मेलन च हिस्सा लैता ते नारको आतंकवाद सरबंधी तंत्र गी तबाह करने ते नशे दी कवैतू दा मुकाबला करने दी जम्मू—कश्मीर दी वचनबद्धता गी पक्का कीता। सम्मेलन गी संबोधित करदे होई एलजी होरें दस्सेआ जे ब'रे 2024 दरान नशीले पदार्थें दी तस्करी खलाफ ठोस कार्रवाईयां करदे होई सरबंधत कानून दे तैहत् तस्करें दिएं 188 संपत्तियें दी कुर्की लेई शिनाख्त कीती गेदी ऐ। एह्दे अलावा बार—बार नशे दी तस्करी च मुलव्वस पाए जाने आहले 274 दोषिएं गी पी.आई.टी.—एनडीपीएस कनून तैहत् हिरासत च लैता गेआ ऐ। श्री सिन्हा होरें गलाया जे पिच्छले केई ब'रें दे मुकाबलें च ब'रे 2024 दरान खरे मते सुधार आंदे गे न ते 210 दोषिएं गी सजा बी दोआई गेई ऐ। उनें आखेआ जे सरकार नशे दे गैर—कनूनी कारोबार गी पूरी चाल्ली तबाह करने लेई दृढ़ संकल्प ऐ कीजे एह कारोबार देसै दी सुरक्षा ते अखंडता लेई सिद्दे तौर पर चुनौती पैदा करदा ऐ। उनें दस्सेआ जे नेय मामलें पर तेज रफ्तार कार्रवाई लेई 5 विशेष एनडीपीएस अदालतां स्थापित कीतीआं गेइयां न।

<><><><><><>

Satish Sonowal

युवा सेवाएं ते खेड्डें सरबंधी विभाग दे मंत्री सतीश शर्मा होरें कल बंदरगाहें, ज्हाजरानी ते जलमार्गें सरबंधी केन्द्री मंत्री सरबानन्द सोनोवाल हुंदे कन्नै मलाटी कीती ते जम्मू—कश्मीर च अंतर्देशीय जल मार्गें ते शैहरी इलाकें च पानी सरबंधी परिवहन ज्जेय महत्वपूर्ण मामलें पर चर्चा कीती। मंत्री होरें पानी सरबंधी ट्रांसपोर्ट आहले ढांचे ते अंतर्देशीय जलमार्गें सरबंधी परियोजनाएं दे ऐलान लेई केन्द्र सरकार दा आभार जताया। इ'नें परियोजनाएं च झेहलम दरेया च क्रूज सैलसफा लेई जैटिटियां चलाना, छत्ताबल बन्न दी मरम्मत सरबंधी कम्म

बी शामिल न। गल्लबाट दरान मंत्री होरें भारत दे अंतर्देशीय जलमार्ग प्राधिकरण ते बंदरगाहें, जहाजरानी ते जलमार्गे सरबंधी मंत्रालय तैहत जम्मू-कश्मीर च जलमार्ग ते जल स्रोत विकसित करने दी बेशुमार समर्थ पर लोऽ पाई ते आखेआ जे एह कन्नै खित्ते दे समाजी-आर्थिक विकास च बड़ा मता जोगदान होग। सतीश शर्मा होरें केन्द्री मंत्री होरें'गी डल झील, नगीन झील, मनसाबल, मानसर, सरुईसर, रन्जीत सागर ते होरनें महत्वपूर्ण दरेयाएं जि'आं सिंध, झेहलम, चिनाब, रावी, मुनावर तवी ज्नेय महत्वपूर्ण जल मार्गे दे विकास बारै बी अवगत करोआया।

<><><><><><>

Ramban

रामबन दे समाज कल्याण मैहकमे आस्सेआ जिले च महिलाएं दे सशक्तिकरण सरबंधी प्रोग्राम तैहत मिशन शक्ति दी शुरूआत कीती गई ऐ। एहदा मकसद महिलाएं दी सुरक्षा ते उनेंगी आर्थिक तौर पर सशक्त बनाना ऐ। एहदे तैहत केई सारियां सेवां जियां कनूनी सेवा ते परामर्श बगैरा उपलब्ध करोआया जा'रदा ऐ। एहदे अलावा 24 घंटे कम्म करने आले हैल्पलान ते आरजी आसरमे बी उपलब्ध करोआए जांगन। रामबन च प्रशासन आस्सेआ महिलाएं गी सशक्त बनाने लेई केन्द्र कायम कीते गे न तां जे इलाके दिए जरूरतमंद महिलाएं गी फौरी मदाद उपलब्ध करोआई जाई सकै।

<><><><><><>

Weather / Highway

मौसम विभाग नै 14 जनवरी तगर मौसम खुश्क ते बदलोखड़ा रौहे दी पेशगोई कीती ऐ। यान्त्रुएं गी राष्ट्री जरनैली शिड़क उप्पर दिन दे समें च यात्रा करने दी सलाह जारी कीती गई ऐ। उआं जम्मू श्रीनगर राष्ट्री जरनैली शिड़क उप्पर दौने बक्खी दा गड्डिएं दी आओजाई बरोबर जारी ऐ। तोआई मुगल शिड़क जेहड़ी राजौरी ते पुंछ गी शोपियां जिले कन्नै जोड़दी ऐ, पिच्छले केई दिनें थमां बर्फ गी हटाने दे कम्म दे चलदे अजें बी बंद पेदी ऐ।

<><><><><><>